

Xujun xi kin'ekjǐhi xuta xi ntje Hebreo tjehe_n ra

*B'ǐ ts'ín tís'ejña chji nga kinchjako_ná Ntǐaná nk'ie
nga kits'ín nibá Ntǐhi*

¹ Nkjin nǐyá kǒ kj'áǐ kj'áǐ ts'ín kinchjako_n Ntǐaná ntje cháná. Já profeta kits'ínchjén nga kinchja nǐstjin nk'ie. ² Tunga nǐstjin fekuhu xi kich'aá nd'áǐ Ntǐaná kits'ín nibá Ntǐhi nga j'ai nchjako_ná ngajoho. Kui Ntǐu xi kits'ínchjén nga kits'ínnda asuntee kǒ nk'a já_n, kǒ kitsjáha nga kama ts'e ngayjee ni xi tjǐn.

³ Ajǐhǐn Ntǐu sakúchji kjuachánkaha Ntǐaná kǒ kui xi bakúchji kjuatík'uhun Ntǐaná. Kui xi ts'ín nga s'e ngayjee ni xi tjǐn tu ngat'aha nga'yún chánkaha éhen. Nk'ie nga ja kikjexínná ngatitsunná nga kits'ín jená nginkun Ntǐaná, ngjik'ieǐñat'aha Ntǐaná nk'a já_n.

*B'ǐ ts'ín tís'ejña chji nga 'yún nk'a tǐen Jesu nga
ntǐtsjee*

⁴ 'Yún nk'a kin'etsjen nga ntǐtsjee, at'aha tu nkuhú kui xi 'mi Ntǐhi Ntǐaná. ⁵ B'ǐ kitsúhu Ntǐaná nga kinchjako_n:

Jǐ xi Ntǐna,

an xi tsichu ma Na'mihǐ.

Ndaha nku ntǐtsje najmi b'a kik'ihǐn. B'ǐ ts'ín kinchjanǐjmíyaha Ntǐhi:

An xi kama Na'mihi,

kǒ kui xi kama Ntǐna.

Nk'ie nga b'a kitsú, najmi ntítsjee
kinchjaníjmíyaha.

⁶ Nk'ie nga kits'ín nibá Ntí tjuhun asuntee, b'í
kitsú:

Ngatentee ntítsjena kats'íntsjoho.

⁷ Kò b'í ts'ín kinchjaníjmíyaha ntítsjee:

Ntítsjena, kui xi xi nkúhu ntjo.

Kò xi ts'ínxát'ana, kui xi xi nkúhu njai nd'í.

⁸ Tunga b'íhí ts'ín kinchjaníjmíyaha Ntíhí:

Ntía ní, ji xi kuatexumai sín,

kò kuatexumai sisin nk'ie nga kuatexumai.

⁹ Tsjohi ni xi naxu tjín,

kò najmi sasíhin ni xi najmi nda.

Kui nga j'ajíhin ra an xi Ntíahí,

kò 'yún kitsjaha kjuatsjo nga xi tjíntujíhin.

¹⁰ Kò b'í tã kitsú sa:

Ji xi Ntía,

nga tuts'ihín ni kin'endai asuntee,

kò ntsai kin'endakohoni nk'a ján.

¹¹ Kfe ngayjee ni xu'bí,

tunga ji tu nkú kuinchunní.

Kama chá ngayjee niu xi nkú joyaha tsa najyun.

¹² Kama b'a n'eihí xi nkúhu nku najyun,

kò n'ek'óntjaiyai

xi nkú ts'ín n'ek'óntjaiya nku najyun.

Tunga ji bi najmi k'óntjaiyai,

kò ndaha nku nístjin najmi kama cháí.

¹³ Ndaha nku ntítsje najmi b'í kik'ihín:

Tinchint'ání má batexuma,

k'uentú maná xi fi kontrahi kinte tsukui.

¹⁴ At'aha ntítsjee bi, kui xi ntjo xi ts'ínxát'aha

Ntíaná. Kui xi n'e nibá tu xi basinkoho xuta xi
ts'íinkjáihín nga k'uanki.

2

B'i ts'ín tís'ejña chji nga tjíhin nga n'esihín én xi kits'ín nibáná Ntíaná

¹ Kui kjuaha tjíhin nga 'yún n'esihín raá ni xi kinu'yáá, tū xi najmi kuankín t'axíhin raá ni xi ts'e Ntíaná. ² At'aha santaha én xi kits'ínkjas'en ntitsjee kis'ehe nga'yún kō kits'ínkjáíhin chjí xi kanéhe ngayjee xutá xi kits'ín ngatitsun nga najmi kint'é'éhen éen. ³ Kui nga nd'ai, ¿nkú ts'ín kuitjunkiinná tsa najmi n'esihín én chánka xi ts'ínk'ankiná? Tjun Nda Ntíaná kitsúya xi nkú ts'ín kuankihiná kō as'ai xi incha kint'éhe nga b'a kitsú kitsúya kixi ngáhaná kui niy. ⁴ Kō Ntíaná tá tsakúchji nga kjuaxi éen. Kits'ín ni xi bakúchji kjuachánkaha kō nga'yúhun kō nkjin tíkjá kjuankjún, kō xi nkú ts'ín mjehe kits'ínndzjoná kjuanda xi tsjá Espiritu.

B'i ts'ín tís'ejña chji nga xi nkúhu ñá j'ai ts'ín ma yjohō Jesu

⁵ Asunnte xi tíchubanijmíyahaná, xi as'ai nibáhá, najmi aya ntsja ntítsjee y'éjñaya Ntíaná, tsa kui xi incha kuatéxumaha. ⁶ Tjít'a xujun éhen Ntíaná má nga b'i kitsú nku xi kinchja:

¿Yáha xutá, nga najmi ndyjajihin kjuankjintak'uhin?

¿Á ch'axkihí rí xutá, yáha kui?

⁷ Chubahá 'yún kinte kin'e mai nga ntítsjee, kō kik'aihí kjuachánka kō nga chankjún.

⁸ Aya ntsja y'entuyái ngayjee ni xi tjín asuntee.

Nk'ie nga aya ntsja xutá y'éntuyá Ntíaná ngayjee ni xi tjín, ndaha nku ni najmi y'éjña ndái ma.

Tunga nk'iehé nga chasehéé, yaá nga najmi ngayjee niu tjíntuyáje aya ntsja. ⁹ Tunga yanáá xi nkú ts'ín Jesu. Tu chubahá 'yún kinte kin'e ma nga ntítsjee. Kik'aihi kjuachánka ko tíyankjún at'aha j'ajin ngabayoo. Tu ngat'aha kjuandaha Ntíaná ngabayaha Jesu ngandaná kamaha.

¹⁰ Tu xi nkjin kamaha ntíhi Ntíaná xi sakúhu ra kjuachánka, Ntíaná xi kits'ínnda ngayjee ni xi tjín ko ngat'aha Ntíaná tjíntuhu niu, kits'ín nga ajihin kjuu'uun kama Cristo xi tjíhin nga kama, tu xi ts'ínk'ankihi xuta. ¹¹ At'aha xi ts'ín je xuta nginkun Ntíaná ko xuta xi n'e je, nkuhú maha Na'mihi. Kui kjuaha nga najmi ma subaha ra Ntíhi Ntíaná nga nts'e tsuhu ra xuta xu'bo.

¹² Tjít'a xujun éhen Ntíaná má nga b'a kitsú:
Ji k'uenijmíhi já nts'é,
ko ts'intsoho ajihin xuta xi ma ñjakú nga ts'intsjohi.

¹³ Ko b'i kitsú ya:

Kama 'yún tak'an Ntíaná.

Ko b'a ta kitsú sa nginku niyá:

Á an ei síjñaka ntíhi Ntíaná xi kitsjána.

¹⁴ Xi nkú ts'ín yjoninte y'a ntí xi tíinchako Jesu, kui nga b'a ta kik'iehe. B'a kik'ie tu xi nk'ie nga kuayáha ts'ínkjehe xi batéxumaha ra ngabayoo, kui xi ndanindoo. ¹⁵ B'a ts'ín kits'ín ndaíhi ra ngatentee xuta xi y'entuhu xi nkúhu xuta musu xi kich'atse at'aha kitsankjún ngabayoo.

¹⁶ At'aha tíña chji chji nga najmi ntítsjee j'aisinko. Xi ntjehe ní Abraham y'aha ra, kui xi j'aisinko. ¹⁷ Kui kjuaha nga j'ai ts'ín maha yjoho xi nkúhu já nts'e, tu xi nginkun Ntíaná tsichu maha nku nda na'mi tíjun xi ma nimaha xuta

ko xi kixi fiko xáha, tu xi kama b'a ts'ín tsjáha ra chje Ntíaná nga k'uéchjí ngatitsuhun xuta. ¹⁸ Kikie kjuanimá ko kichjut'ayák'un. Kui kjuaha nga ta ma basinkoho nd'ai xi chjut'ayák'uhun.

3

B'i ts'ín tís'ejña chji nga 'yún nk'a tjen Jesu nga Moise

¹ Kui b'a maha, já nts'e, jun xi kin'e jenuu ko j'ájinnuu Ntíaná nga kjuáts'enuu, n'enkjíntak'un si-siun yáha Jesu. Kui xi y'éxáha Ntíaná ko kui xi nda na'mi tíjtun xi s'ejinná. ² Kui xi kixi kits'ín nginkun xi kitsjá xáha, xi nkú ts'ín Moise ta kixi ngjiko xáha ajihin ngayjee xuta xi ts'e Ntíaná.

³ Yún chánka sa kjuachánka xi kikanéhe Jesu nga xi kikanéhe Moise. B'a kama xi nkú ts'ín 'yún chánka sa kjuachánka xi ts'ínkjáihin nda xi ts'ínnda nku ni'ya nga kjuachánka xi sakúhu ni'yoo at'aha tsjo tjín. ⁴ Tu má ni'yahá ni, tjín xi ts'ínndaha. Tunga ngayjee ni xi tjín, Ntíaná kits'ínnda.

⁵ Nku nda musu xi kixi ngjiko xáha ajihin xutaha Ntíaná kama Moise. Kui xi y'éjña chji ni xi kuitsu Ntíaná askahan. ⁶ Cristo bi, ta kixi fiko xáha, tunga Ntíhí tí'mi bi. Kui nga batéxumaha ra ni'yaha Ntíaná. Ko ni'yoo, kui xi ñá nd'ai. Ni'yaá tsa tu nku ndjáhá kuinchajían ni xi ma 'yún tak'aán ko tsjo maná at'aha tichuyáhaá ni xi tsjáná Ntíaná.

B'i ts'ín tís'ejña chji ni xi maha xi fi t'axihin Ntíaná

⁷ Kui b'a maha, n'esihin ruu xi nkú ts'ín tjít'a ni xi titsu Espirituhu Ntíaná:

Tsa nd'ai kuinú'yó ntaha,

⁸ najmi tu ndjá b'eyo animanu,

xi nkúhu já xi kits'ínkj'a t'axín éнна,
 n̄stjin nga kikjut'ayák'unna nanki kixiu.

⁹ Yo kikjut'ayák'unna ntje chánu xi nkú k'an,
 ndaha tsa yachán nú kieke ni xi kits'ian.

¹⁰ Kui nga kits'inkjankohona xuta xi kis'e nk'ie
 ko b'a kixian:

“Ja kindyjajih̄in jái,
 ko najmi mjehe incha k'úémajin ni xi ts'an.”

¹¹ Kui nga kama kjahanna
 ko ts'intjusan ni xi kixian,
 nga najmi kjuas'en xuta xu'bo,
 má nga ts'ínkj'áíya xuta xi ts'an.

¹² Chuhun yjonu, já nts'e. Najmi tu kas'e
 ajinnu xi najmi nda tjíya animaha, xi najmi
 s'ejih̄in, xi ngjuai t'axih̄in Ntíaná xi tjíña tík'un.

¹³ Tu sa ní xki n̄stjin b'i ngján tjen nga'yúhuun
 xinkiu nk'ie nga tjíña sa n̄stjin xi tútsu éhen
 Ntíaná, tu xi ndaha nku xi tjin ajinnu najmi
 k'uanachaha ra ngatitsuun ko ndjá s'eya animaha.

¹⁴ Tísakút'aná nd'ai ni xi ts'e Cristo, tunga tjíh̄in ni
 nga tu nku ndjáhá kuinchajián xi nkú ts'in kama
 'yún tak'aán Ntíaná nk'ie nga tuts'ih̄in ni. B'a n'eé
 santaha n̄stjin xi fekuhu.

¹⁵ At'aha tinchjako saná éhen Ntíaná xi b'i ts'in
 tjít'a:

Tsa nd'ai kuinú'yó ntaha,
 najmi tu ndjá b'eyo animanu,
 xi nkúhu já xi kits'ínkj'a t'axín éнна.

¹⁶ ¿Yá xutaha xi kint'é tunga kits'ínkj'a t'axih̄in
 éhen Ntíaná? ¿A najmi ngatenteehé xuta xi
 tsitjuko Moise Egipto? ¹⁷ ¿Ko má xutaha xi
 kits'ínkjanko Ntíaná yachán nú tjíhin? ¿A najmi

xi kits'íhín ngatitsun? Kui xi kis'entu yjoninte k'iehen ante kixiu.

¹⁸ Kō nk'ie nga b'a kitsú kixi kixi Ntíaná nga: “Najmi kjuas'en xuta xu'bo má nga ts'ínkj'áíya xuta xi ts'an”, ¿yá xi kits'ínkjó nga b'a kitsú? ¿A najmi xuta xi najmi kint'é'éhén? ¹⁹ Kui nga yahaná nga najmi kama incha jas'eheh at'aha najmi kis'ejihin Ntíaná.

4

B'i ts'in tís'eña chji nga xuta xi ts'e Ntíaná kjuas'en ante xi má nga ts'ínkj'áíya

¹ Kui b'a maha, b'a títu saha nd'ai éhen Ntíaná xi títuya títjun nga kuitjás'eén má nga tsjá Ntíaná nga ts'ínkj'áíya xuta xi ts'e. Tunga tjihín ni nga kjuántaha raá yjoná tu xi najmi s'ehe xi natsin k'úentu. ² At'aha ñá ta kis'enijmíná én nda tsuhu Ntíaná. Kama xi nkú ta ts'in kis'enijmíhi xuta xu'bo. Tunga máha kui, najmi tsakj'á kjuanda xi y'a éen at'aha najmi kis'ejihin én xi kik'inyaha.

³ Tunga ñá xi ja kis'ejinná kuitjás'eén má nga ts'ínkj'áíya xuta xi ts'e Ntíaná. B'i kitsú Ntíaná: Kui nga kama kjahanna ko ts'intjusan ni xi kixian, nga najmi kjuas'en xuta xu'bo, má nga ts'ínkj'áíya xuta xi ts'an.

B'a kitsú ndaha tsa ja kama ndjuúhu xaha Ntíaná nistjin nga kits'ínnda asunntee. ⁴ At'aha b'i ts'in tjit'a xujun éhen Ntíaná ngat'a ts'e nistjin xi yatuu: Nistjin xi ma yatuhu kama ndjuúhu ngayjee xaha Ntíaná ko kits'ínkj'áíya.

⁵ Kō b'a tā títu ya:

Najmi kjuas'en xuta xu'bo,
má nga ts'ínkj'áíya xuta xi ts'an.

⁶ Kui b'a maha, ndyjat'a sa xuta xi kjuas'en yo. At'aha xi tjun kis'enijmíhi én nda tsuhu Ntíaná najmi kint'é'én, kui nga najmi jas'ehe yo. ⁷ Kō kui nga tā y'éjñahá ngáha Ntíaná kj'ai nistjin, kui xi nd'ai. Askahan nga ja j'a nkjin nú, kits'ínkinchja David nga b'i kitsú xi nkú nga ts'in ja kab'et'á ei: Tsa nd'ai kúnú'yó ntaha, najmi tu ndjá b'eyo animanuu.

⁸ At'aha tsa Josue kitsjáha xuta xu'bo nga incha ts'ínkj'áíya, najmi tjín xi nkú ts'in kj'ai nistjihin tā k'uéjña ngáha Ntíaná. ⁹ Kui kjuaha nga tjña sa nga ts'ínkj'áíya xuta xi ts'e Ntíaná xi nkú ts'in kits'ínkj'áíya Ntíaná nistjin xi yatuu.

¹⁰ At'aha xi kjuas'en má nga tsjáha Ntíaná nga ts'ínkj'áíya, kui xi ja kama ndjuúhu xáha xi nkú tā ts'in Ntíaná kits'ínkj'áíya nga ja kama ndjuúhu xá xi kits'in. ¹¹ Kui nga n'ehe ná nga'yún nga kuitjás'eén má nga ts'ínkj'áíya xuta xi ts'e Ntíaná, tu xi najmi s'ehe ajinná nku xi kujjne, tsa b'a tā ts'in xi nkú nga kits'in xuta xi najmi kint'é'én.

¹² Éhe Ntíaná najmi ni k'ien. Tjihin nga'yún. Kui xi 'yún yjo sa nga ngayjee kicha xi yjo nga jo ngaba. Nga masehen animaná kō espirituná fas'enjin nga bateya, kō nga masehen má tjixanyaha nintaná kō na'yuhu nintaná fas'enjin nga bateya. Base sisin ni xi n'enkjintak'aán kō xi nkú ts'in tjíya animaná. ¹³ Najmi tjín ni xi kamanda xi najmi tibe Ntíaná. Tjintu chji chji. Najmi tjín ni xi tjintu'máha xi tjihin nga n'ekjas'eheén kuenta.

B'í ts'ín tís'ejña chji nga Jesu xi nda na'mi tíjunná
 14 Kui nga tjíhin nga tu nku ndjáhá kuinchajihinná xi s'ejinná. At'aha tíjñaná nku nda na'mi tíjún chánka xi tsichu ndjiojmi ján, kui xi Jesu Ntíhi Ntjaná. 15 Kó Nda na'mi tíjunná, kui xi maha base nimaná nk'ie nga najmi ndjá tíyaná, at'aha kó ta kui ta kichjut'ayák'un xi nkúhu ñá, tunga ndahá ichí najmi kits'ín ngatitsun. 16 Kui nga najmi tu jo jan kas'eyahaná nga kfink'úhuún Ntjaná xi batéxumaná kó xi tjíhin kjuanda, tu xi b'a ts'ín kama nimaḥa ra ñá kó sakúná kjuandaha xi kuasinkoná nistjin nga un skuená.

5

1 Ajihin xuta chj'ajin ngayjee xi ma nda na'mi tíjún kó 'bai xáha nga kui xi tsjén tíjuhún xuta nginkún Ntjaná, tu xi tsjáha chje kó ts'íink'ien chu tu xi kama ndyjat'aha ngatitsuún. 2 Be xi nkú ts'ín base nimaḥa xuta xi machjéhen nga sakúyaha kó xi kindyjajihin, at'aha nda na'mi tíjún ta xutahá niu. 3 Kui nga machjéhen nga ta tsjáha chje xi ts'e tu xi kama ndyjat'aha ra ngatitsuhún, xi nkú ts'ín ta tsjá chjehe xuta naxinantóo.

4 Nk'ie nga b'í tsu xá xi ts'ín jóo, najmi kui b'et'a xá suba yjoho. Ntia níná tsjá xá xu'bi, xi nkú ta kamat'ain Aaron nistjin nk'ie. 5 Cristo bi, nk'ie nga kama nda na'mi tíjún, najmi kui suba ts'asje nk'a yjoho. Ntia níná xi b'a kits'ín. B'í kitsúhu:

Ji xi Ntina,

an xi tsichu ma Na'mihí.

6 Kó b'í ta ts'ín tjit'a ya éhen Ntjaná:

Ji xi nda na'mi tu nk'éhé ni.

B'a ts'ín tíjña xáhi

xi nkúhu xá xi ts'e nda na'mi Melkisedec.

⁷ Nk'ie nga y'ejña Cristo asunntej, animaha ngjikj'áha ra nga kinchjako Ntíaná ko kikjaníndzjo ntánkun. Tsankihí Ntíaná nga ts'íinkj'a t'axíhin ngabayoo, ko tsasínñju Ntíaná ni xi kitsú at'aha tu xí kits'ínkjas'ehén ra yjoho Ntíaná. ⁸ Ndaha tsa kui xi Ntíhi Ntíaná, tunga j'ajihín kjuanima. B'a ts'ín kikiehe ni xi 'mihí nga nuú'yá'één. ⁹ Ko nk'ie nga ja kama xi tjíhin nga kama, tsichu ma xi tu nkjéhe ni ts'íink'anke ngayjee xuta xi kuint'é'éhen. ¹⁰ Ko Ntíaná kits'ín maha nda na'mi tíjún nga kitsjáha xá xi tjeheh ra Melkisedec.

B'i ts'ín tís'ejña chji nga tjíhin nga kfinndjukaá xi s'ejinná

¹¹ Ngat'a ts'e ni xu'bjí tjin nkjún sa ni xi kuixín kai, tunga 'nihí tjin nga k'úejña chjihí, at'aha ja najmi ta kitsa mankjihinnuu. ¹² Ja ní nd'ai tjíhin nga kamo já maestru kai, tunga tu yje machjén sahanuu xi kuakúyanuu nku niyá sa ni xi tjun binchiyáá éhen Ntíaná. Jun ja ta tsichu ma ngáhanu xi nkúhu ntínta xi machjéhen ntáchiki. Kui xi najmi nichine nda machjéhen. ¹³ Ngatentee xi baki, kui xi ntínta ko najmi kjee be má nihi xi naxu nginkun Ntíaná. ¹⁴ Tunga nichine ndoo, já xi chóo ma kjine. Kui xi ts'ínchjén tehente kjuankjintak'uhun ko mankjihín má nihi xi nda ko má nihi xi najmi nda.

6

¹ Kui b'a maha, ja kuichu chubá nga k'úéntaá ni xi tjun binchiyáá Cristo, tu xi tu nku kfinndjunáá ni xi ndyjat'ána nga cháá. Najmi chubaha nga ta

sakúya ngáhaná nga kfinchj'a ngáha raá animaná, kō tsa tā sakúya ngáhaná nga k'úentaá ni ch'onk'un xi ngabayoo fikoná, kō tsa tū nku sakúyaháná nga s'ejinná Ntíaná, ² kō ni xi ts'e nga mjenéé ntsaá xinkjá nga saténtáá, kō nga ni xi ts'e nga kuichú nistjin nga kj'uaíya ngáha ra xuta ngabayoo kō nk'ie nga kuasehe Ntíaná mí nihi xi kits'ín nga nkúnkú xuta. ³ Mjeni kuakúyaihi ni xi ndyjat'ánuu. B'a n'eí tsa Ntíaná tsjánteni.

⁴ Xuta xi ja tsichu mankjihin ni xi ts'e Ntíaná kō kits'intsjojín ni xi tsjáná Ntíaná, kō tā kisakút'aha Espirituhu Ntíaná, ⁵ kō kits'intsjojín én ndaha Ntíaná kō nga'yúhun Ntíaná xi kama chji askahan, ⁶ tsa k'uéjña ni xi ts'e Ntíaná xi ja kikjut'a ngayjee ni xu'bi, najmi tā tjin xi nkú ts'ín kama tsetse saha, tsa nguaikj'á ngáha ra animaha. At'aha tā kuihi kuenta ts'e suba tíncha fát'a kruu xi ma jo niyá ngáha Ntíhi Ntíaná kō títsjante nga tíchajnucha Ntíhi Ntíaná.

⁷ B'a maha xuta xi yjanki Ntíaná, xi nkúhu t'ananki xi nkjin niyá b'anehe ts'í. Tsjáha chan xi kjine xi ts'ínxásun t'anankiu, kō Ntíaná nda ts'ínko t'anankiu. ⁸ Tunga t'ananki xi tū jñáhá tsjá kō na'yá, ndaha tsa ts'íu b'anehe, kui xi najmi chumi ni chj'íhi ra kō ni xi najmi nda nginkun Ntíaná bichú ma. Kui xi sakúhu nga kuiti.

⁹ Kō máha jun, já nts'e xi tjoní, ndaha tsa b'a ts'ín tíchubai, behe tak'uin nga jun xi sakúnuu ni xi'yún nda sa. Kui ni xi y'aha ra nga k'uankiá. ¹⁰ Kixi ts'ín Ntíaná kō najmi ts'ínchaya ni xi kin'o kō xi nkú ts'ín tsakuchj'ú nga tjonuu Ntíaná nk'ie nga nda kin'ekoo xuta xi ts'e nistjin nk'ie, xi nkú nga tā t'n'o

santaha nd'ai.

¹¹ Mjeni nga tu nkú b'a n'enú santaha nistjin xi fekuu tu xi sakú kikjihinnuu ni xi tichuyóho.

¹² Najmi mjeni tsa kama ts'o. Tu sa ní b'a ta n'oo xi nkú nga incha ts'in xi sakúhu ni xi kitsúhu Ntíaná nga tsjáha. Kui xutaha xi tu nkú s'ejihín ra Ntíaná ko maha kuyá.

B'i ts'in tís'ejña chji nga ts'in Ntíaná ni xi tsu

¹³ Nk'ie nga kitsúya tíjün Ntíaná ni xi tsjáha Abraham, ta y'éjña nga ts'íintjusun ni xi kitsú. B'a kits'in at'aha najmi tjin xi 'yún chánka sa, tsa kui xi ts'íinkie nga ts'íintjusun ni xi kitsú. ¹⁴ B'i kitsú Ntíaná: "An ts'ian nga nda kamat'ain ko an ts'ian nga ntje xi s'ehi 'yún nkjin kama." ¹⁵ Kikuyá k'uk'un Abraham ko kui nga kits'ínkjáihín ra ni xi kitsúya tíjün Ntíaná nga tsjáha.

¹⁶ Xuta, tu xi chaha ra nga ts'íintjusun ni xi túb'enda, nku xi 'yún nk'a tjen nga kui ts'ínkie nga ts'íintjusun éhen. B'a ts'in najmi ta s'ehe én. ¹⁷ Kui nga y'éjñaha Ntíaná nga ts'íintjusun ni xi kitsú, at'aha kama mjehe nga skué sisihin xi ts'ínkjáihín ni xi kitsúya tíjün nga tsjáha ko nga najmi ts'ínk'óntjaiya éhen.

¹⁸ Ntíaná najmi maha b'anacha. Kui nga nga joo ni xi kitsúhu Ntíaná najmi maha b'óntjaiyaha, ko kui niu xi tsjá nga yúnná ñá xi kich'aá ni xi kik'inná nga n'ekjáihín. ¹⁹ Nk'ie nga b'a ts'in tichuyáhaá ni xi tsjáná Ntíaná, tísasjña ntsjan ntsjan animaná nga tíma 'yún tak'un xi jas'en santaha ante xi 'yún nkjúhun ninku xi síjña ndjiojmi ján. ²⁰ Yo má nga jas'en Jesu ngajoná, nga ngji tíjunná. Ko kui xi

tsichu ma nda na'mi títjun xi nkú ts'ín tjeheñ ra Melkisedec. Najmi ma feya xáha.

7

B'i ts'ín tís'ejña chji xáha nda na'mi Melkisedec

¹ Melkisedec, kui xi kama nda reihí nanki Salem ko nda na'mi xi kits'ínxát'aha Ntíaná, Ntíaná xi tíjña nk'a ján. Nk'ie nga ja tík'óya ngáha Abraham nga kits'ín nganaha já rei xi ngji kjánko, as'ai Melkisedec ngjikj'á niyáha ko nda kinchjane nginkun Ntíaná. ² Ko Abraham ta kitsjáha nku tíkjá ngayje ni xi kisakúhu.

J'áin Melkisedec, kui xi tsuhu ra “nda rei xi naxu ts'ín”. Ko nda reihí Salem, kui xi tsu ngáha ra “nda reihí kjuajyu”. ³ Najmi yaha má nibaha ra. Najmi kis'ehe na'mi ko naa ko ntje chá. Kui xi najmi kitsin ko najmi k'ien, nda na'mi xi nkú nga ts'ín nda na'mi Ntíhi Ntíaná. Najmi maha feya xáha.

⁴ Chasoo xi nkú ts'ín 'yún chánka Melkisedec. Santaha ntje cháná Abraham kitsjáha nku tíkjá ni xi kisakúhu nga ngji kjánko já rei. ⁵ Tjít'a kjuatéxumaha Moise nga já na'mi xi y'aha ra ntjehe nda na'mi Levi tíhin nga ts'ínkjáihin nku tíkjá ni xi sakúhu xuta, ndaha tsa xinkjín maha xinkjín, at'aha nkuhú ntjehe Abraham y'aha ra.

⁶ Tunga Melkisedec xi najmi ntjehe Levi y'aha ra, kui xi kits'ínkjáihin nku tíkjá ni xi kisakúhu Abraham ko nda kinchjane nginkun Ntíaná Abraham, nda xi Ntíaná kitsúya títjuhun ni xi tsjáha. ⁷ Ko tíjña chji chji nga 'yún chánka sa xi nda nchjane xinkjín nginkun Ntíaná nga xi nda chubantjái.

8 Nk'ie nga nku t́kjá tóon ts'ínkjáíhín já nà'mi xi ntjehé Levi y'ahá rá, a xutáhá xi ts'ínkjáíhín kui niu, xi ndyjun nkiní kuayá. Tunga ngat'a ts'e Melkisedec b'a t́tsu éhen Ntíaná nk'ie nga kui najmi k'ien. 9 Kó nk'ie nga Abraham kitsjáhá Melkisedec nku t́kjá ni xi kisakúhu, ma b'a bixíaán nga kó Levi ḱtsjá, ndaha tsa Levi xi askahan ts'ínkjáíhín nku t́kjá ni xi sakúhu xutá. 10 B'a t́jín kjáíhín at'ahá Levi t́jñajin sa yjonintehe Abraham ństjin nga j'aikj'á nnyáhá Melkisedec, at'ahá yaá nga Abraham xi ntje cháhá Levi.

B'i ts'ín tís'ejña chji á nku ndá nà'mi títjun tsetse kamachjéhen

11 Xutá Israel kits'ínkjáíhín kjuatéxumaha Ntíaná nk'ie nga t́jín xá já nà'mi xi y'ahá rá Levi. Tunga najmi tsichukjuahá rá xáhá já nà'mi xu'bo nga ts'ín nga kama xutá xi t́jín nga kama. Kui kjuaha kamachjéhen nga j'aihi kj'ai ndá nà'mi xi kik'aihi xá xi nkúhu xi ts'e Melkisedec, najmi xi nkúhu xi ts'e Aaron. 12 Kui nga tsa t́b'óntjaiya xáhá já nà'mi, tá t́jín nga tá n'ek'óntjaiya kjuatéxuma xi y'ahá rá Moise.

13 At'ahá xi t́tsu éhen Ntíaná ei, xi k'uaihi xá xi nkúhu xi ts'e Melkisedec, kui xi y'ahá rá kj'ai ntjehé xutá Israel má nga najmi kjee bitjujin ndaha nku ndá nà'mi. 14 T́jña chji chji nga Ndá Ntíaná Jesucristo ntjehé Juda nibahá rá, ntje xi najmi kits'ínkjó Moise nk'ie nga kinchjá nga s'e já nà'mi.

15 Yún t́jña chji chji sa ni xi t́chubayaá ei. At'ahá ndá nà'mi tsetse xi j'ai b'a t́jín xáhá xi nkúhu xi ts'e Melkisedec. 16 Najmi kik'ai xáhá xi nkú ts'ín

tíjña kjuatéxuma xi títsuya má ntje cháha nibaha ra já na'miu. Kik'ai xá níhi at'aha tíhín nga'yún nga tíjña tík'un sín. Najmi maha 'me.

¹⁷ At'aha b'i ts'ín tjit'a má nga tíchubanijmíyaha:
 Ji xi nku nda na'mi santaha tu nkjéhé ni.
 B'a ts'ín tíjña xáhi
 xi nkúhu xá xi ts'e Melkisedec.

¹⁸ Kui b'a maha, tsichukjet'aha kjuatéxuma chóo, at'aha najmi kis'ehé nga'yún ko najmi tsasinkoná.

¹⁹ At'aha najmi kamaha kjuatéxumoó nga ts'ín nga kama xuta xi tíhín nga kama. Tunga nd'ai 'yún nda sa ni xi tíchuyáá xi tsjáná Ntíaná, kui nga tibichúk'un tíñaha raá Ntíaná at'aha kui ni tíchuyáá.

²⁰ Nk'ie nga kama ni xu'bi, Ntíaná kikjihín y'éjña nga kuitjusun. ²¹ At'aha nk'ie nga kik'ai xáha já na'mi xi ntjehe Levi nibaha ra, najmi Ntíaná kikjin y'éjña. Tunga ngat'a ts'e nda na'mi xu'bi, Ntíaná kikjihín y'éjña nga kuihí xi kama nda na'mi. At'aha b'i ts'ín tjit'a má nga b'a kik'ihín:

Ntíaná y'ejña ni.

Najmi ts'ínjo éhen nga b'i kitsú:

“Ji xi nku nda na'mi tu nkjéhé ni.”

²² Kui nga Jesu kits'íhin nga nku ni tsetse y'éndako ngáha Ntíaná. 'Yún nda sa kjuá tsetse xu'bi nga kjuá xi chóo.

²³ Nkjin nkjún kama já na'mi xingisoó at'aha ngabayoo y'échjaha nga ngjuajndjuko xáha.

²⁴ Tunga máha Jesu, najmi kfet'a xáha at'aha tíjña tík'un sín. ²⁵ Kui kjuaha nga maha ra ts'ínk'anki síhin xi f'aik'úhun Ntíaná tu ngat'aha ni xi kits'ín, at'aha kui xi tíjña tík'un tu nkjéhé ni ko bankintjái xuta xi ts'e.

26 At'aha machjénná nku nda na'mi tíjún xi nkúhu xu'bi, nku xi je, xi najmi n'enijéhe ra tsa mí nihi, xi najmi chuntí, xi najmi kin'engujihin já ngatitsuun. Kui xi n'etsjoho ndjiojmi ján. 27 Kui xi najmi tjihin nga xki nistjin tjun tsjá chje tu xi n'endyjat'aha ra ngatitsuhun ko askan ngáha tu xi n'endyjat'aha ra ngatitsuhun xuto, at'aha b'a incha ts'in já na'mi xingisoo. Nkuhú niyá kitsjá sín chje nk'ie nga kits'ínkjas'en yjoho. 28 Kjuatéxumoo já na'mi tíjún xi yjoninte y'a kitsjá xáha, tunga askahan nga kitsjá Ntjaná kjuatéxumoo, as'ai y'éjña nga kitsjá xáha Ntíhi. Kui xi kin'e ma xi tjihin nga kama. B'a kik'ie sín.

8

B'i ts'in tís'ejña chji xáha Jesu ndjiojmi ján

1 Nd'ai tíjñaná nda na'mi tíjún xi b'a tjín xáha, kui xi Ntjaná kitsjáná. Ngjik'iejñat'aha Ntjaná má tibatéxuma ndjiojmi ján. Kuihí ni xu'bi xi mjeni nga choo. 2 Kui xi tjihin xá ante xi 'yún nkjúun, ante xi tíjña aya ninku najyunte xi kui kikjin. Kui xi Ntjaná kits'innda, najmi xuta.

3 ¿Má xi kui xáha já na'mi tíjún? Chje tsjá ko ts'ínk'ien chu xi f'aiko xuta. Kui nga Jesucristo ta tíjñaha ra chje xi tsjáha. 4 Tsa ni xi k'úejñaha ei asunntej, najmi ka ma ra nda na'mi kai, at'aha ja tjín já na'mi ei xi tsjá chje xi nkú ts'in tít'a kjuatéxumoo.

5 Ninku ni'ya najyunte xi kui kikjihin nk'a ján tíjña. Kui nga xi tíjñaha ei, kui xi ma joho. Yo má nga ts'ínxá já na'mi xi tjín asunntej. Ko yaá ni xu'bi at'aha nk'ie nga ts'ínnda Moise ninku

najyuntee, Nt̄ianá b'a kitsúhu: “Nda nda chasei. B'a n'ek'ié sisin ngayjee xi nkú t̄jín xi tsakuhu nga tsichuk'unní asunntu t̄jennkiu.” ⁶ Tunga nd'ai 'yún nda sa xá xi kik'aihi Jesucristo nga já na'mi xi t̄jín asunntej. Kui xi kits'inchéhen Nt̄ianá nga y'éndako xuta ni tsetse xi 'yún nda sa, at'aha Nt̄ianá kitsúya t̄tjun ni xi 'yún nda sa xi tsjáha xuta xi ts'e.

B'i ts'in t̄s'ejña chji ni xi y'enda tsetse Nt̄ianá

⁷ Tsa najmi chumi nihi xi kindyjat'aha ni xi tjun y'éndako Nt̄ianá xuta, najmi kamachjén xi ma joho kai. ⁸ Tunga najmi kisasihín ra Nt̄ianá ni xi kits'in xuta xi ts'e. B'a ts'in t̄jít'a éhen Nt̄ianá:

B'i kitsú Nt̄ianá: Kuichú n̄stjin, nga k'uendáka nku ni tsetse xuta Israel ko xuta Juda.

⁹ Ko ni tsetse xi tíxian nga k'uendá, najmi b'a joyaha xi nkúhu xi y'endáka ntje cháha, nga jakj'a ntsja nga kik'onsje ante Egipto. At'aha najmi ndjá tsinchajin ni xi tjun y'endáka, kui nga kits'in nga maha ra.

¹⁰ Kuichú n̄stjin nga kuihí ni xu'bi xi k'uendáka xuta Israel. K'uejñájian kjuatéxumana kjuankjint'ak'uhun, ko ta k'uet'á asun animaha. An xi kama Nt̄iaha, ko kui xi kama xutana.

¹¹ Najmi ta b'i ngján kuakúyaha ra já nts'e, ko ta ndaha xinkjín, tsa tu xi skuéhe nga an xi Nt̄iaha. At'aha ngatentee skuena, xi 'yún ndyjahá ko santaha xi 'yún cháha.

¹² An ts'inndyjat'aha ngatitsuhun,

ko najmi ta ts'inkj'áitsjehenna jéhe.

¹³ Nk'ie nga Ntíaná tít's'ínkjó ei nga nku ni tsetse tít'énda, kui xi tsuhū rā nga ja chá xi tjuun. Ni xi ja chá xi najmi ta ndaha, kui xi ja najmi ta tse kamaha rā ma.

9

B'i ts'ín tís'ejña chji xi nkú chjun nínku najyuntee

¹ Ni xi tjun y'énda Ntíaná kitsúya xi nkú ts'ín tjihin nga n'etsjohó, tunga asunnteihí kisasínjña ante nkjún xi má nga n'etsjohó. ² B'i ts'ín kin'enda nínku najyuntee. Ante xi tjuun, kui xi kik'in ante nkjún. Yo kisasínjña nd'í setiū kó kis'ejña yámixa xi s'entusún nínkuān chje.

³ Kó ante xi tíjña astun najyun xi ma joho xi tjenchja aya nínku najyuntee, kui xi kik'in ante xi 'yún nkjún. ⁴ Yo kis'ejña nachan chje toonsine xi má nga s'etísun ni xi sinjne. Kó yo ta kis'ejña kaxa tsje xi kijjnyjehe toonsine. Kui xi bakúchji nga Ntíaná y'éndakó nku ni xuta xi ts'e, kó aya kaxó kisasínjñaya chutsín toonsine xi má nga kis'eya nichine manaā, kó ta kis'ejñaya yánisehe Aaron xi kitjuhu nts'én, kó ndjiote xi tjit'a kjuatéxumoo. ⁵ Asun kaxó kis'entusún jo xi yjaha tsjanka. Kui xi tsakúchji kjuachánkaha Ntíaná kó kitsjennéhe tsjankaha ante xi má nga Ntíaná kikjexín jéhe xuta. Ngat'a ts'e ni xu'bjí najmi machjéhen tsa 'yún tse chubanijmíyaá nd'ai.

B'i ts'ín tís'ejña chji xá xi kis'ehe nínku najyuntee

⁶ B'a ts'ín kis'enda ni xu'bjí, as'ai fas'en tehente já na'miū ante xi tjuun nga ts'íntjusun xáha. ⁷ Tunga máha ante xi ma joho, nku tutuhú nda na'mi

títjuun fas'en yo. Nku niyá fas'en xki nú. Ko nk'ie nga fas'en yo, tjíhin nga ngjuaiko jní tu xi tsjáha chje xi k'úechjí ngatitsuhun ko ngatitsun xi tu ndyjehé ra kits'ín xuta. ⁸ B'a ts'ín bakúchjihi Espirituhu Ntíaná nga nk'ie nga tíjña sa ninku najyunte xi tjuun, najmi kjee yaha niyá xi bichú ante xi 'yún nkjúun.

⁹ Ngayjee niu bakú chubayaná xi nkú ma nd'ai. At'aha chje ko chu xi n'ek'ien najmi maha b'éya xi nkú ts'ín tjíhin nga s'eya kjuankjintak'uhun xuta xi kui niú ts'intsjokoho ra Ntíaná. ¹⁰ Najmi maha b'a ts'ín niu at'aha ni xi títsuhú kjuatéxuma xu'bo xi tu a tjent'ahá, tu ni chinehé y'aha ra ko ni xi s'i ko nga kj'ai kj'ai ts'ín ts'ín je yjoho xuta nginkun Ntíaná y'aha ra. Kui xi n'etjusun santa nkúhu nga kj'ai k'úejña gáha Ntíaná.

B'i ts'ín tís'ejña chji ni xi kits'ín jníhi Jesu

¹¹ Tunga ja j'ai Cristo ko nd'ai kui xi nda na'mi títjun xi bangisjainá ni xi nda kjuaxi. Kui xi jas'en ninku najyunte xi 'yún nda sa ko xi nda kikjin, xi najmi xuta kits'ínnda. Kui xi tsuhu ra nga najmi asuntee y'aha ra. ¹² Nkuhú niyá jas'en ante xi 'yún nkjúun. Najmi jníhi chutentsu ngjiko yo ko ta ndaha jníhi ntí turu. Jní xi ts'e ní ngjiko. B'a ts'ín y'échjintjai síhinná.

¹³ Jníhi turu ko jníhi chutentsu ko nasuhu ntí turu xi kití, kui xi saténdzjojnúhu xuta xi najmi je nginkun Ntíaná, ko kjuaxi nga b'a ts'ín ma jehe ei asuntei. ¹⁴ Tsa ni xi b'a ts'íhin kui niu, ¿a najmi 'yúhún tjín saha nga'yún jníhi Cristo? Kui xi tíjñajihin Espiritu xi tíjña sín nk'ie nga kitsjá yjoho xi nkúhu nku chje xi je nginkun Ntíaná. Kui

nga jníhi Cristo ts'ín jehe kjuankjintak'unná, tu xi najmi ta n'ehená ni xi fikoná ngabaya nga tu sahá tsjénnkihí Ntíaná xi tǵña tǵk'un.

¹⁵ Kui b'a maha, Cristo k'ienntjáhi xuta ko b'a ts'ín kits'ín ndáhi ra ngatitsun xi incha kits'ín nk'ie nga chǵi saha ra ni xi tjun y'énda Ntíaná. Ko Cristo kits'ín nga kama chǵi ra ni tsetse xi y'énda Ntíaná, tu xi xuta xi Ntíaná j'áihin kama ts'ínkjáin síhin ra ni xi kitsúya tǵjun nga tsjáha.

¹⁶ Xi nkúhu xuta, kintehe ni nga kuayá, b'énda tǵjun ni xi kama ts'e ntíhi. Tunga najmi kamahá n'ekjáihin niu tsa najmi tjun kuayá xi kitsjá niu.
¹⁷ At'aha nǵstjin nga kuayá xuta xi b'a kits'ín chǵi ra ni xu'bo, tunga tsa tǵña tǵk'un sa, najmi kje chǵi ra niu.

¹⁸ Ko b'a ta kits'ín Ntíaná. Jní ta y'éndakoho ni xi tjuun. B'a ts'ín kama chǵi ra kui ni.
¹⁹ B'a kits'ín Moise nk'ie nga kitsúyaha ngayjee xuta nga nkúnkú kjuatéxuma xi tǵt'a xujun kjuatéxumo. As'ai jak'á jníhi ntí turu ko jníhi chutentsu. Ntánijua kits'íntjijinkoho ko kitsungijin tsanka xi ni ko yá isopo. Kui xi kits'ínchjén nga tsaténdzjojnúko ra jníu xujun kjuatéxumo ko ta ngayjee xuto. ²⁰ As'ai b'a kitsú Moise: “Kui jní xu'bi xi tǵts'ín nga chǵi ra ni xi tǵb'éndakonuu Ntíaná.”

²¹ Ko Moise ta tsaténdzjojnuhu jníu ninku najyuntee ko ngayjee ni xi n'echjén yo nga n'etsjoho Ntíaná. ²² Xi nkú nga ts'ín tǵt'a kjuatéxumo nga tu xi nku ni kama jehe nginkun Ntíaná, jníhi xi maha b'a ts'ín. At'aha tsa najmi ngjuai ndzjo jní, najmi tǵjín kjuan'endyjat'a.

B'i ts'ín tís'ejña chji nga Jesu kits'ínkjas'en yjoho ngandaná

²³ B'a ts'ín tjihin nga kin'e je nginkun Ntjaná ni xu'bo. Kui niu xi b'éjña chubaya ni xi tjin ndjiojmi ján. Tunga máha ni xi tjin ndjiojmi ján, nku chje xi 'yún nda sa nga xu'bo kamachjéhen nga kin'e je. ²⁴ Cristo najmi ante xi 'yún nkjún xi ntsja xuta kits'índakoho jas'en, ko tsa nku xi b'a mama tjin xi nkú nga tjin xi kui kikjin. Ndjiojmi ján ní tsichu ko tijná nginkun Ntjaná nd'ai ngandaná.

²⁵ Ko najmi jas'en ndjiojmi ján tsa tu xi nkjin niyá tsjáha chje yjoho, xi nkú ts'ín fas'en já na'miu ante xi 'yún nkjún nga xki nú fas'enko jni xi najmi kui ts'e. ²⁶ At'aha tsa nkjin niyá jas'en Cristo yo, nkjin ra niyá k'ien kai, b'aha ra nkúhu nga kamanda asuntee ko santaha nd'ai. Tunga nkuhú niyá tsakúchji yjoho nd'ai, nistjin fekuhu xi kich'aá nd'ai, ko kits'ínkjas'en yjoho xi nkúhu chje tu xi kits'ín t'axihin ngatitsuun.

²⁷ Xi nkú nga ts'ín tijná nga ngayjee xuta tjihin nga nkuhú niyá kuayá ko askahan chasehe mí nihi xi kits'ín, ²⁸ kui nga b'a ta ts'ín Cristo nkuhú niyá kitsjá yjoho xi nkúhu chje nga kikjexín ngatitsuhun xuta. Ko nk'ie nga kj'uaí niyá xi ma joho, najmi kj'uaí tsa ngatitsun ts'íinndyjat'a. Xuta xi tikuyá níhi kj'uaíkj'á.

10

B'i ts'ín tís'ejña chji nga nkuhú niyá kitsjá Jesu chje tu xi n'endyjat'aha ngatitsuun

¹ Kjuatéxumaha Moise tu 'ya y'éjña chubayahá ni nda xi kj'uaí askahan. Najmi kui xi nda kikjiun.

Kui nga kjuatéxumoꝝ ndahachí najmi maha ra ts'ihin nga kama xi tjihin nga kama xuta xi xki nú f'aik'uhun Ntjaná nga ta kuihi chje tsjá. ² At'aha tsa xuta xi chje tsjáha Ntjaná nkuhú niyá kama je kai, najmi b'a ta kuitsuhu kjuankjintak'uhun nga je tjeheñ ko najmi ta tsjáha chje. ³ Tunga chje xi tsjá ní xki nú, kui xi ts'ínkj'áitsjeheñ nga tjihin ngatitsuñ. ⁴ At'aha jnihi turu ko jnihi chutentsu najmi maha kjexín ngatitsuñ.

⁵ Kui b'a maha, nk'ie nga j'aihi Cristo asuntee, b'i kitsú:

Najmi kin'e mjei chu xi n'ek'ien ko chje,
kui nga nku yjoninte kin'ek'ahaní.

⁶ Najmi kama tsjohi chu xi s'etíje,
ko ta ndaha xi n'ek'ien nk'ie nga s'echjí ngatitsuñ.

⁷ Kui nga b'a kixihinna: “Á an ei.

Ji Ntjana, jáa tu xi ts'intjusuhunna ni xi mjehi,
xi nkú ts'ín tínchjanijmíyahana xujun éhin.”

⁸ Títjun b'i kitsú nga kinchja: “Najmi kin'e mjei ko ta ndaha najmi kama tsjohi chu xi n'ek'ien ko chje ko chu xi s'etíje ko xi n'ek'ien nga s'echjí ngatitsuñ.” B'a kitsú ndaha tsa b'a títsu kjuatéxumoꝝ nga xuta tjihin nga tsjá ni xu'bo.

⁹ Askahan b'i ta kitsú sa: “Á an ei. Jáa tu xi ts'intjusuhunna ni xi mjehi.” B'a ts'ín kits'ín t'axíhin chje xi tjun kits'ínkjó tu xi y'éjñaha ni xi kitsú askahan. ¹⁰ Ko at'aha kits'íntjusun Jesucristo ni xi mjehe Ntjaná, kui nga tsichu ma jehená nginkun Ntjaná nk'ie nga nkuhú niyá kits'ínkjas'en yjonintehe xi nkúhu chje.

¹¹ Ngayjee já na'miu xki nistjin ts'ín xá xi kanéhe. Nkjin niyá tu nku kuihí xáha xi ts'ín nga tsjá chje,

chje xi ndahachí najmi maha kjexín ngatitsun. ¹² Tunga Jesucristo nkuhú niyá kitsjá chje. Kui xi kits'inndyjajnu ngatitsuhun xuta ko tu nkjéhé ni chjíhi ra. As'ai ngjik'iejñat'aha Ntíaná. ¹³ Yo tíjña nga tikuyá santa nkúhu nga k'úentu Ntíaná xi fi kontraha kinte tsuku. ¹⁴ Nkuhú chje kitsjá tu xi kama ha xuta xi kík'áts'e xi tjíhin nga kama ko b'a k'úentu sín.

¹⁵ Ko Espirituhu Ntíaná b'ejña chjiná niu nga b'i tsu:

¹⁶ Nk'ie nga b'a kama, títsu Ntíaná,
kuihí ni xu'bi xi k'uendáka xuta xu'bo.
K'uejñájian kjuatéxumana kjuankjint'ak'uhun,
ko ta k'uet'á asun animaha.

¹⁷ Ko b'i ta kitsú:

Najmi ta ts'inkj'áitsjen sahana
ngatitsuhun ko ni ch'onk'uhun.

¹⁸ Ko má nga n'endyjat'a ngatitsun, najmi ta n'ek'ien saha chu nga s'echjí.

B'i ts'ín tís'ejña chji nga tjíhin nga kfinndjukaá ni xi tsjáná Jesu

¹⁹ Kui b'a maha nd'ai, já nts'e, ngat'aha ngabayaha Jesu najmi ta binchankjúhun raá yjoná nga kuitjás'eén ante xi 'yún nkjúun. ²⁰ At'aha Jesu kikjex'áná niyá xi f'atikjá najyun xi tjenchja ante xi 'yún nkjúun, nku niyá tsetse xi tíjña tík'un. Kui najyuun, kui xi tsuhu ra yjonintehé Jesu. ²¹ Ko kui xi nda na'mi k'akuná xi basehe ninkuhu Ntíaná. ²² Kui nga ngayjehe animaná tjink'úhun raá Ntíaná ko najmi tu jo jan katumaná nga s'ejinná Ntíaná. At'aha ja kin'e je animaná. Najmi ta chuntí tjíyaha kjuankjintak'unná ko ja kin'e chunkoho ntánijua je yjonintená.

23 Ndjá tinchajían ni xi tichuyáá, at'aha b'a ts'ín s'ejinná kō yaá nga ts'ín Ntíaná ni xi kitsú. 24 Tinchísjai niyáá xi nkú ts'ín b'i ngjáhán kuisinkaá xinkíá tū xi s'e sahaná kjuatjo kō nga n'e saá ni xi nda. 25 Najmi tū b'ejñaá nga kama ñjakúkaá xinkíá, xi nkú incha ts'ín k'ua. Tū sa ní b'i ngján tjen nga'yúhúun xinkíá, kō 'yún b'a n'e saá at'aha tíyaá nga túbichú tiña nistjin nga k'uaí Nda Ntíaná.

26 Tsa ja yaá én xi naxu tjin kō tū nku t'n'enáá ngatitsun, najmi ta tjin saha chje xi k'uaí tū xi n'endyjat'aha ngatitsunná. 27 Nku tutuhú nkjúhún kjuá xi n'ená ndyjun nkiní chúyahaá kō nd'í xi tū xi 'yúhún xi ts'ínkjekoho Ntíaná xi fi kontraha.

28 Nistjin nk'ie, xi najmi ts'íntjusun kjuatéxumaha Moise, kui xi najmi ch'a ma nímaha nga n'ek'ien. B'a ma tsa jo kō tsa jan xi kuitsuya jé xi kits'ín. 29 Tsa b'a ts'ín nkjún tíjña kjuatéxumoo, ¿mí ni xi n'ehe xi tíasinne Ntíhi Ntíaná? ¿Mí nihi xi n'ehe xi tū a nihí tímaha jní xi y'éndakoho Ntíaná ni tsetse xi ts'ín jehe xuta xi b'a títs'íun? ¿Mí nihi xi kamaha xi ch'on títsuhú Espiritu xi ts'índzjo kjuandaha Ntíaná? 'Yún tse kjuanima xi ts'íínkjáihín xi b'a ts'íun.

30 Yaá nga b'i kitsú Ntíaná: “Ahán xi k'uasjé chjíá, an xi tsjaha chjíhi.” Kō b'i ta ts'ín tjit'a ya: “Ntíaná kuasehe mí nihi xi kits'ín xuta xi ts'e.” 31 ¡Tū xí nkjúhún tjin nk'ie nga Ntíaná xi tíjña tík'uun ts'ínk'íéchjí xi najmi benkjúhún!

32 N'ekj'áítsjohon yjonuu nistjin nk'ie, nk'ie nga as'ai kamankjihinnuu én nda tsuhú Ntíaná. 'Yún ndjá tsincho nga kin'e chúkjuo kjuanima xi kisakúnuu. 33 Tjin nistjin nga ch'on kik'innuu kō

kin'e'unnūu nginkun ngayjee xuta nantio, ko kj'ai nistjin ngaha ta kamaoo xuta xinkiu xi b'a ta kamat'ain. ³⁴ Ta kama nimanuu xuta xi kjintuyá'yún ko kin'ekjón nga kichju'ánūu ni xi tjinnūu. Tsjo kamanuu nga b'a kamat'on at'aha yo nga ndjiojmi ján tijnanuu ni xi 'yún nda sa xi najmi maha fe.

³⁵ Tu nkú katuma 'yún tak'unnú Ntjaná, at'aha tsa b'a n'oo, chánka chji xi n'ekjóhoo. ³⁶ Tjihin nga n'e chukjuo ni xi tímat'on, tu xi kama n'ehenu ni xi mjehe Ntjaná ko b'a ts'in sakúhunuu ni xi kitsúya títjun nga tsjá. ³⁷ At'aha b'i ts'in tjit'a éhen Ntjaná: Ndyja sa ichí nga kj'uaí xi tjihin nga kj'uaí, najmi ta k'uandayaha ra.

³⁸ Xuta xi ts'an xi ja naxu nginkán k'úejña tík'un tu ngat'aha nga s'ejihin an. Tunga tsa nguainjihistun, najmi ta sasíhinna kui xuto.

³⁹ Ná najmi xuta xi finjihistun nga tífi xi má nga ndyja. S'ejin níná ko tíchuhún animaná.

11

B'i ts'in tís'ejña chji ni xi 'mihí ko nkú tsuhú ra nga s'ejinná Ntjaná

¹ Nk'ie nga s'ejinná Ntjaná, ya kixiá nga n'ekjáihín ni xi tíchuyáhaá ko behe tak'aán nga kjuaxi ni xi najmi tíma chjiná. ² At'aha kis'ejihin xuta xi kis'e nistjin nk'ie, kui nga nda ts'in incha kichubanijmíyaha.

³ At'aha s'ejinná Ntjaná, kui nga yahaná nga én xi tsitjuhu ts'a Ntjaná kits'índakoho asuntee ko mankjinná nga ni xi tíyaá kin'endakoho ni xi najmi ma chji.

⁴ At'aha kis'ejihin Abel Ntíaná, kui nga kitsjáha ra Ntíaná chje xi 'yún nda sa nga xi kitsjá Cain. At'aha kis'ejihin, kui nga Ntíaná b'a kitsúhu nga kui xi nku nda xi naxu kō kits'ínkjáihin chjehe. Kō ndaha tsa ja k'ien Abel, tūnga túbakú chubayaháná xi nkú ts'ín kis'ejihin.

⁵ At'aha kis'ejihin Enoc Ntíaná, kui nga Ntíaná ngjiko tik'uhun ra ndjiojmi ján kō najmi k'ien. Najmi ta kisakúhu, at'aha Ntíaná jakj'ájihinséhen. Kō kintehe ni nga kichjubé, nda ts'ín kichubanijmíyaha nga kits'ín ni xi kisasihin Ntíaná. ⁶ Tsa najmi s'ejihin xuta Ntíaná, najmi tjin xi nkú ts'ín sasihin ra Ntíaná xuta xu'bo. At'aha xi mjehe kj'uaik'un tiñaha Ntíaná, tjihin nga s'ejihin nga tíña Ntíaná kō nga Ntíaná tsjáha ni xi nda xuta xi bangisjaihi.

⁷ At'aha kis'ejihin Noe Ntíaná, kui nga kint'é'éhen nk'ie nga Ntíaná kitsúya tíjuhun ra ni xi najmi kjee ma chji kō kits'ínnda tsutsu chánkoō nga kits'ínk'anki xuta xi ts'e. B'a ts'ín kis'ejñanehe ra xuta nga kfe, kō kisakúhu Noe nga naxu kama nginkun Ntíaná at'aha kis'ejihin.

⁸ At'aha kis'ejihin Abraham Ntíaná, kui nga kint'é'éhen nk'ie nga kichubaha nga ngjuai nanki xi ts'ínkjáihin askahan, ndaha tsa najmi be sisin má nga ngji nga tsutju. ⁹ At'aha kis'ejihin, kui nga y'ejñaha nanki xi kitsúya tíjuhun ra Ntíaná nga tsjáha, ndaha tsa y'ejña xi nkúhu nku nda xi xin nibáha. Ni'ya najyunte y'ejñayako Isaac kō Jacob, xi askahan ta ts'ínkjáihin ni xi kitsúya tíjuhun Ntíaná. ¹⁰ B'a kits'ín Abraham at'aha ja tíñajin kjuankjintak'uhun nga nanki xi najmi

ndya k'úéjña, xi Ntíaná k'uénda kò ts'ínnda.

¹¹ Kò at'aha kis'ejihìn Abraham Ntíaná, kui nga kik'aihi rá nga'yún nga kamaha na'mi, ndaha tsa ja chá nkjún kò ntì Sara, at'aha kis'ejihìn nga Ntíaná ts'íntjusun ni xi kitsúya tíjuhùn. ¹² Kui nga nku nda xi najmi tá tjihìn rá nga'yún yjonintehe, kui xi kis'ehe ntje xi b'a ts'ín nkjin tsichu ma xi nkúhu niñu xi tjin nk'a ján kò xi nkúhu tsumí xi tjin andai ntáchak'uun, kui xi najmi maha s'exki.

¹³ Ngayjee xuta xu'bi incha k'ien nga najmi kits'ínkjáihìn ni xi kitsúya tíjuhùn Ntíaná nga tsjáha. Tunga incha kis'ejihìn rá kò kama chubayahá niu, kò b'a incha kitsú animaha nga kui xi xin incha nibáha kò nga tú tjímasúhùn asuntej. ¹⁴ Xi b'a incha tsu, kui xi bakúchji nga nanki xi ts'e tíincha bangisjai. ¹⁵ At'aha tsa tú nku kama bahá rá má nga incha nibaha, kik'óya rá ngáha kai. ¹⁶ Tunga kama mjehé rá nku ante xi 'yún nda sa, kui xi tijn ndjiojmi ján. Kui nga najmi ma subaha rá Ntíaná nga ya nga kui xi Ntíaha xuta xu'bo, at'aha Ntíaná ja y'éndaha nku nanki.

¹⁷ At'aha kis'ejihìn Abraham Ntíaná, kui nga kitsjáha Isaac xi nkúhu tsa chje nk'ie nga kikjut'ayák'uhùn Ntíaná. Kama k'un nga xi nkúhu nku chje tsjá ntí nku tutuhu, ndaha tsa ntíu kinchjajin Ntíaná ¹⁸ nga b'i kitsúhu: “Isaac y'aha rá ntje xi s'ehi.” ¹⁹ B'a kitsú Abraham nga Ntíaná tjihìn nga'yún xi má nga ts'ínkj'álya ngáha rá xuta ngabayoo. Kui nga kisakú ngáha rá ntíhi xi nkúhu tsa j'álya ngáha rá.

²⁰ At'aha kis'ejihìn Isaac Ntíaná, kui nga nda kinchjanehe Jacob kò Esau nginkun Ntíaná nga

kitsúyaha ni xi kama askahan.

²¹ At'aha kis'ejihin Jacob Ntíaná, kui nga kintehe ni nga kuayáha, nda kinchjane nginkun Ntíaná nga nkúnkú ntíhi Kuse. Kits'íntsjoho Ntíaná nga y'a'yúhún ko ya yánisehe nga tsisintjen.

²² At'aha kis'ejihin Kuse Ntíaná, kui nga kintehe ni nga kuayáha, kitsúya títjun nga kuichú nístjin nga kuitju xuta Israel ante Egipto ko kitsúya xi nkú n'ehe nintaha.

²³ At'aha kis'ejihin xi cháha Moise Ntíaná, kui nga kingjáña 'maha ntíu jan sá tjíhin nk'ie nga kitsin, at'aha incha kieke nga tsjo tjin ntíu ko najmi kitsankjún kjuatéxuma xi kitsjá nda rejhi Egipto.

²⁴ At'aha kis'ejihin Moise Ntíaná, kui nga najmi kits'ín yuhu nga ntíhi takjihin nda faraon k'úhín ra nga ja kama chá. ²⁵ Kama mje níhi nga ta sakút'aha kjua'un xi tíbehe xutaha Ntíaná ko najmi nga ts'íntsjojin kutju kjuatsjo xi tsjá ngatitsuun. ²⁶ Kits'ínkjink'un nga 'yún chjí saha ra kjuanima xi sakúhu nga kjuanchiná xi tjin ante Egipto, at'aha kikuyáha chjí xi ts'ínkjáihín askahan. Ta kuihi kjuanima xi akahan sakúhu xi ts'ín nibá Ntíaná ngajoho.

²⁷ Ko at'aha kis'ejihin Ntíaná, kui nga tsitjuhu ante Egipto ko najmi kitsankjún kjuakjahan nda rei. Najmi kits'ínkjehe k'un, at'aha b'a kama xi kieke Ntíaná xi najmi ma chji kamaha. ²⁸ Ko at'aha ya kis'ejihin Ntíaná, kui nga ts'asjehe S'í Pascua ko kitsjákuja nga jní n'ek'ikoho ankjuaha ni'yaha xuta Israel, tu xi ntítsje xi ts'ínk'iehen ntí tjuhún xuta Egipto najmi ts'ínkoho ntí tjuhún xuta Israel.

²⁹ At'aha kis'ejihin xuta Israel Ntiana, kui nga j'atikjaha Ntachak'un Niu xi nkuhu tsa nanki kixi. Tunga k'ienjinntaha ja jun Egipto nk'ie nga kama mjehe nga b'a ta incha ts'in ko kui.

³⁰ At'aha kis'ejihin xuta Israel Ntiana, kui nga tsixuntuhu xjoho nanki Jerico askahan nga y'emandai xuta Israel yo yatu nistjin tihin.

³¹ At'aha kis'ejihin naska Rahab Ntiana, kui nga najmi k'iehen xi nkuhu xuta xi najmi kint'een, at'aha nda ts'in kits'inkjaih'in ja jun Israel xi tsichukase maña yo.

³² ¿Ko mi nihi xi xin sa? Tse nkjun ngjuaikona tsa kuinchjanijmíyahana nda Gedeon, nda Barak, nda Sanson, nda Jefte, nda David, nda Samuel ko ja profeta. ³³ At'aha kis'ejihin Ntiana joo, kui nga tjin xi kits'in nganaha ra ja rej, ko nga nda tsatexumaha xuta xi ts'e, ko nga kits'inkjaih'in ni xi kitsuya titjun Ntiana nga tsaha, ko nga kits'in nganaha xoo, ³⁴ ko nga kits'ink'ienya nd'i xi tu xi 'yuhun, ko nga tsitjunkihi yjoho nga kis'ehe kicha, ko nga kitsja nga'yuhun yjoho ndaha tsa najmi ta chukjuaaha ra, ko nga ndja ts'asje yjoho nga kikjan, ko nga tsanka tjenni ja jun kontraha.

³⁵ Kis'e jminchjin xi kits'inkjain tik'un ngaha ra xuta xinkjin xi ja k'ien. Ko tjin nga xi un kiekehe nga k'ien, at'aha ante xi 'yun nda sa nga kjuaiya ngaha ra mjehe. Kui nga najmi kits'in yuhu nga ts'ihin ni xi kik'ihin tu xi kama nda'ih'i ra kai. ³⁶ Ko ta tjin xi kichajnuha ko kis'ehe, ko santaha kis'e'yun ko kis'entuyá'yun.

³⁷ Ko tjin xi ndjio kis'ehe, ko xi kicha'ya ki-tikjaha, ko xi kicha ndju kin'ek'ienkoho. Ko

tjín xi y'emasún nga chubá kingjahá tjabaxíhín chutsanká kō xi ts'e chutentsu. X'an y'entu, kō kitsjennkí uncha, kō kin'e'uhun. ³⁸ Y'emasún nanki kixiū kō ajin asunntu tjenki. Y'entuyá tixá ngijoo kō tixá xi yja t'anankiū. Xuta xu'bi, kui xi 'yún nda kama nginkun Ntíaná. Asunntee najmi tjeheñ ra xuta xu'bi.

³⁹ Nda ts'ín kichubanijmíyaha ngayjee xuta xu'bi at'aha kis'ejihín Ntíaná, tunga najmi nistjihín kisakúhu ni xi kitsúya títjun Ntíaná nga tsjáha. ⁴⁰ B'a kama at'aha kits'ín kuantaná Ntíaná. Najmi kitsjá nga nkuhú kui xuta xu'bo kama xi tjíhin nga kama. Kama mje níhi Ntíaná nga ta ñja ta ñja kamakáa xuta xu'bo xi tjíhin nga kamaá.

12

B'i ts'ín tís'ejña chji nga Ntíaná ts'ínk'a niyá xi tjoho

¹ Kui b'a maha, kitsendáihíná xuta xi bakú chubayaná xi nkú ts'ín kis'ejihín Ntíaná. Kui nga t'entu t'axíhinná tu mí nihí ni xi ts'ín'áíná kō ngatitsun xi mjehe k'ojennkiná, kō tjen nga'yúhuún yjoná nga kfin jahaná má títbankíaán. ² Nkuhú Jesu xi n'eshihín. Kui xi kik'atuts'ihín nga s'ejinná kō ts'ín nga s'ejinná xi nkú ts'ín tjíhin nga s'ejinná. Kikie títjun kjuatsjo xi sakúhu kō kui nga kits'ihin nga'yún nga k'ient'á kruu kō najmi nkjún kamaha ngat'aha kjuasuba xi kisakúhu nga b'a ts'ín k'ien. Kō askahan y'ejñat'aha Ntíaná má nga batéxuma.

³ Chase chubayohoo Jesu xi 'yún nkjún kits'ín chúkjuá nk'ie nga kitsújnu kitsút'aha já ngatitsuun. Chase chubayohoo, tu xi najmi kfentahanuu kō

kfehe ra tak'un. ⁴ Tíbixkjankoo ngatitsuun, tunga najmi kjehe sakunu ngabaya nga b'a tin'o.

⁵ Ko ja kin'echayo en xi tsjanianuu, xi titsuya nga jun xi ntih Ntiana. At'aha b'i ts'in tijt'a:

Ji ntina, najmi tu tohon mahi
 ehén Ntiana xi ts'ink'a niyahi,
 ko najmi tu nekjehe tak'uin
 nk'ie nga ndja kuinchjakohi.

⁶ At'aha Ntiana ts'ink'a niyaha xi tjoho,
 ko bjaha ngatentee xi bichu ma ntih.

⁷ N'echukjuo nk'ie nga ts'ink'a niyanuu Ntiana, at'aha Ntiana tits'inkonuu xi nkuhu ntih. Ngatentee xi ti'mi na'mi ts'ink'a niya ntih. ⁸ Tunga tsa najmi ts'ink'a niyanuu Ntiana xi nku ts'in ts'ink'a niya ngayjee ntih, tu a tinu ma, najmi ti kikjihin jun.

⁹ Nk'ie nga ndyaná, na'miná xi tjin ei asuntei ts'ink'a niyaná ko yankjaan. ¿Nku ts'in najmi 'yún kuinú'yá'ehén raá Na'miná xi tjña ndjiojmi ján ma, tu xi sakuhuná nga kuintsuba tik'uhunná?

¹⁰ Najmi tu xi tsehé ts'ink'a niyaná na'miná. Ts'in xi nku ts'in ma chubayahá. Tunga nk'ie nga Ntiana ts'ink'a niyaná, ngandaná b'a ts'in, tu xi b'a ts'in ta je kamahaná xi nkuhu kui. ¹¹ Kjuaxi nga najmi tsjo maná nk'ie nga tjin xi ts'ink'a niyaná. Ma un níná. Tunga xi b'a ts'in 'bai niyaha, kui xi askahan b'ejñajin kjuajyu ko be xi nku ts'in naxu fiko yjoho.

¹² Kui b'a maha, n'ehenu nga'yún. Tjen nga'yuhun ruu yjonuu. ¹³ Niyá xi naxu tjen tankíno, tu xi kamandaha tsuku xi nimat'a ko najmi ta ts'onki saha.

B'i ts'in tsejña chji nga najmi kfi t'axihin Ntiana

14 Tinchísjo nga kas'ekonuu kjuajyu ngatentee xuta ko nga kjuaje tintsubajiun. At'aha xi najmi tijnajin kjuaje, kui xi najmi skuē Ntiana. 15 Nda nda chasoo nga najmi tu kas'e ajinnuu nku xi najmi ts'inkjáihin kjuandaha Ntiana, tsa xi najmi nda s'eyaha ko as'ai tsjá kjuasti ko ts'iin nga ajihin nkjin xuta ngjuaitse ni xi najmi ndaha.

16 Najmi tu kas'e ajinnuu xi chuba kjuántukohó xinkjín ko ta ndaha xi najmi skuenkjún Ntiana xi nkú kits'ín Esau. Kui xi kama ntí tjun ko nga kui ts'inkjáihin ni xi ts'e na'mihí, tunga nkuhú nichine kikatéñaha ni xi kanéhe kai. 17 At'aha yo xi nkú ts'ín askahan kin'e t'axín, nk'ie nga kama mjehe nga ts'inkjáihin nga nda kunchjanehe na'mihí kai. Ndaha tsa kikkintá nga tsangisjai niyá, tunga najmi ta kis'ehé ra nki ni xi kits'ín.

18 Jun najmi b'a kamat'on xi nkú nga kamat'ain xuta Israel. Kui xi ngjik'úhūn nku asunntu tjennki xi tijná ei asuntej, xi kis'ejña ndzjen ndzjen nga kití, má nga kama nistjen nistjen ko kis'ejyún ko ntjo kama. 19 Ko kinu'yá tjio ko nku nta xi kinchja. Xuta xi kint'é nto tsanki nga najmi ta kunchjako saha ra, 20 at'aha najmi tsichukjuaha kjuatéxuma xi b'a títuu: “Santaha ko chu xi kuasint'a tsuku asunntu tjennki tihin nga ndjio s'ehé.” 21 Tu ni xi nkjúhún tjin ni xi kama chjiu nga santaha Moise: “Tíb'atsé nkján”, kitsú.

22 Tunga máha jun, tsankink'úhūn Asunntu Tjennki Sion, nanki xi ts'e Ntiana xi tijná tík'uun, nanki Jerusalen xi tijná ndjiojmi ján, má nga kama ñjakú nkjin nkjún ntítsje xi tít'sintsjohó Ntiana, 23 má nga kama ñjakú xi tjun kama ntíhi Ntiana,

xi tjíntut'á j'áihin ndjiojmi ján. Tsankink'úhūun Ntíaná xi kuasehe mí nihi xi kits'ín ngayjee xuta, má nga tjíntu animaha xuta xi naxu kits'ín, xi ja kama xi tjíhin nga kama. ²⁴Tsankink'úhūun Jesu xi kits'ínchjéhen Ntíaná nga y'enda tsetse nku ni. Kō tā tsankink'úhūun jní xi kisaténdzjoō, kui xi bakú chubayaná ni xi 'yún nda sa nga xi tsakú chubaya jníhi Abel nistjin nk'ie.

²⁵ Chúhūun yjonuu. Najmi tū n'e t'axíun xi tínchja. At'aha yaá nga najmi tsitjunki nistjin nk'ie xuta xi kits'ín t'axín xi ndjá kinchjakohō ei asunntej. Kui nga, ¿nkú ts'ín kuitjunkihiná ñá tsa najmi n'eshiin xi tijná ndjiojmi ján xi ndjá tínchjakoná nd'ai? Kui xi Ntíaná. ²⁶ Nistjin nk'ie ntaha Ntíaná kits'ínk'atsé t'anankiu, tunga nd'ai títuya títjun ni xi ts'ín nga b'i títu: “Nku niyá ts'ínk'atsé sa t'anankiu kō santaha nk'a ján.”

²⁷ Nk'ie nga “nku niyá sa” títu, kui xi tsuhu ra nga chjuxin ni xi kin'endoō, ni xi maha f'ajniyá, tū xi b'a ts'ín s'entuhu ni xi najmi maha ra f'ajniyáha. ²⁸ Najmi ma f'ajniyá má batéxuma Ntíaná, kō kui xi n'ekjáihín. Kui nga tjeheñ raá máb'achjíhi Ntíaná kō n'etsjoohó xi nkú ts'ín sasíhin nga 'yún chankjáán. ²⁹ At'aha Ntíaná, kui xi nkú joyaha nku nd'í xi ts'ínk'ejje tū mí nihí ni.

13

B'i ts'ín tís'ejña chji xi nkú ts'ín kuintsubaá

¹ Tehente b'i ngján n'etjō xinkiu, at'aha nkuhú maha Na'minuu. ² Najmi tū n'echayo nga nda ts'ín n'ekjóhōon xi kj'uaísenuu ni'yanuu, at'aha tjín xi

kits'ínkjáih̄in ntítsje ni'yaha nga najmi be tsa ntítsje xi j'aisehe.

³ Tjantaha ruu yjonuu xi kjintuyá'yún, xi nkúhu tsa kō tā jun kisuntuyá'yúnkoo. Kō tā tjantaha ruu yjonuu xi kjuanimā tíf'ajin xi nkúhu tsa kō tā jun b'a tímat'on.

⁴ Ngatento chankjún kjuabixoon, chankjún xi tintsuakoo, at'aha Ntíaná ts'ínkōkjua xi tjín xi kjúájñakō nga najmi kjeē bixan kō xi k'uat'aha xinkjín.

⁵ Najmi tu toon n'e mjo. Katumahanuu ni xi tjínnuu. At'aha b'i kitsú Ntíaná: “Ndahachí najmi k'uejñáha kō tā ndaha najmi ts'in nga maha.” ⁶ Kui nga ma k'aán nga b'a bixihinná:

Ntíaná basinkona,
najmi tjín ni xi kuinchánkjúnna.
¿Mí nihi xi kama ts'ínna xuta?

⁷ N'ekj'áítsjohoon yjonuu já k'aku xi kis'enuu, xi kitsúyanuu éhen Ntíaná. N'enkjíntak'un xi nkú ts'ín y'entu kō xi nkú ts'ín jet'a nistjih̄in, kō b'a ts'ín tā n'e s'ejin Ntíaná xi nkú ts'ín kis'ejih̄in Ntíaná.

⁸ B'a ts'ín tjíyaha Jesucristo nk'ie xi nkú ts'ín tjíyaha nd'ai, kō tu nkú b'ahá ts'ín s'eyaha.

⁹ Najmi tu 'bainto tsa tjín xi k'uanachanuu nga kuakúyanuu kj'ai kj'ai ni. Nda tjín nga sakú nga'yúhun animaná ajin kjuandaha Ntíaná, najmi ajih̄in kjuatéxuma xi tsjá xuta xi b'a tsu nga nichineē sakújinná nga'yún. Ndahachí najmi basinkoná kui ni.

¹⁰ Nginkun Ntíaná tíjñaná nku nāchan chje. Yaá nga tíjña nkjúhun já nā'mi xi ts'ínxát'aha ninku nājyuntee nga kjine chje xi s'ejñasun nāchan chjená.

¹¹ Tíjña nga nda nā'mi tíjuun fas'enkō jníhi chu

ante xi 'yún nkjúhún nínku najyuntee nga tsjá chje tū xi n'endyjat'aha ra ngatitsuhún xuta, tunga najmi máhá tjíntu xuta s'etí yjonintehe chu. Natsin ní s'etí. ¹² Kui nga un kíkíehē ra Jesu natsin nantio, tū xi jníhi kits'ín jekoho xuta. ¹³ Kui nga tjihinsehe raá Jesu natsihin nantio ko kasakúná kjuasuba xi ta kisakúhu. ¹⁴ At'aha najmi tjínná eí nku nanki xi tjíña sín. Nanki xi s'ejña ní askahan tjenkiá.

¹⁵ Kui nga tehente n'etsjoho raá Jesucristo, a jahá Ntíaná tín'etsjoho nga b'a tín'eé. Kui xi chjená. Katitju tsu'baá nga Jesu xi Ntíhi Ntíaná. ¹⁶ Ko najmi tū n'echayo nga n'oo ni xi nda ko nga b'i ngján tšínkoo xinkiu, at'aha ta sasihin Ntíaná chje xu'bi.

¹⁷ Tinú'yá'óhoon já k'akunuu ko chanjúún, at'aha kui xi basehe nga n'oo ni xi tjíhin nga n'oo, ko tjíhin nga ts'íinkjas'eheñ kuenta Ntíaná. B'a n'oo tū xi tsjo k'úéhe ra nga ts'íihin xáha ko najmi áí kamaha xoo, at'aha ta ngandanuu tsa najmi áí kamaha xáha.

¹⁸ Nk'ie nga chubakoo Ntíaná, chubantjání. Ndahá tjíya kjuankjintak'unni nga tín'eí xáni ko mjení nga tū nkú ndahá n'eí.

¹⁹ Chubantjánínú nginkun Ntíaná nku kjuanda, tū xi tsjánte xatíhina Ntíaná nga kfínsenuu.

Nda xi kits'ínnda xujuin b'i ts'ín títs'ínkjet'a

²⁰ Ntíaná xi tsjáná kjuajyu, kui xi kits'ínkj'áíya ngáha ra ngabayoo Nda Ntíaná Jesucristo. Kui xi Nda bastu chánkaha chutsanko, at'aha jní xi ts'e y'éndakoho Ntíaná ni xi najmi maha fe. ²¹ Ntíaná katsjánuu ngayjee ni xi nda xi machjénnuu, tū xi kama n'etjusuhunnu ni xi mjehe. Jesucristo

kats'ínchjén nga katuma ajinná ni xi sasíhín. N'ekié yjoná nga tjíhín kjuachánka Jesucristo santaha tu nkjéhé ni. B'a katuma.

²² Jun já nts'e, tíbankinuu nga nda n'ekjóhōon én xi tíb'et'ánuu ei nga títsjaníyánuu, at'ahá najmi 'yún tse ni xi kuakiet'á.

²³ Mjena nga chōo nga ja tsitju'a nubayóo nda nts'eé Timoteo. Tsa kj'uaíse xatína, kfínka kō kui nk'ie nga kfínsenuu.

²⁴ Tífaniñaha ngayjee já k'akunuu kō ngayjee xi kikj'áts'ehe Ntíaná. Xutá ante Italiá tá tífaniñanuu.

²⁵ Ngatentoō kas'enuu kjuandaha Ntíaná.

Éhen Ntíaná
New Testament in Mazatec, Jalapa de Díaz
(MX:maj:Mazatec, Jalapa de Díaz)

copyright © 2013 Wycliffe Bible Translators, Inc.

Language: Mazatec, Jalapa de Díaz

Translation by: Wycliffe Bible Translators, Inc.

Mazateco, Jalapa de Díaz [maj], Mexico

Copyright Information

© 2013, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mazatec, Jalapa de Díaz

© 2013, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 21 Feb 2024 from source files
dated 29 Jan 2022

e05183c2-7c34-5cdd-8c78-15ea51bd8cbb